

Ina charta geografica visiunaria

DA CLAUDIA CADRUVI / ANR

■ L'emna passada hai jau stuì guardar suenter insatge. Jau hai prendì nanavant mia veglia charta geografica dal Grischun. Quella avev jau anc survegnì en scola primara. Il scolast aveva regalà a nus las chartas antiquadas, forza perquai ch'ins aveva stampà novas chartas. Jau hai tegnì si la charta ed hai adina puspè duvrà ella per dabot guardar suenter ina u l'autra chaussa. Uschia era l'emna passada: Jau hai vulì savair insatge davart il lai da fermada da Limmern che sa chatta al pe dal Tödi. Suenter hai jau gist anc dà in tschit sin ils lais da fermada dal Grischun. Jau hai constatà che l'Engiadina ed il Grischun central n'han betg tants lais da fermada sco la Surselva. Ma tge surpraisa: Tranter il Pass Diesrut, il Passo della Greina e la chamona da

Terri è inditgà in bel e grond lai da fermada. Avant trais onns, cura ch'jau sun stada en la Greina, era quest lai anc betg là. Sfruschar ils egl's n'ha gidà nagut. Il lai da la Greina è là sin la charta: cler e net e blau. Jau hai tschertgà il datum da stampa da la charta. Il 1964 è

ella vegnida edida – pia anc avant ch'jau sun naschida e marschada atras la Greina. Para ch'igl è stà franc e segir per ils cartografs da quel temp ch'il lai da fermada en la Greina vegnia bajegià in bel di. Uschiglio n'avessan els betg nudà il lai da la Greina sin la charta.



Charta da scola dal chantun Grischun, 1964.

FOTO C. CADRUVI